

Häfe-Zunft Brönznau

Schnitzelbänke 2017

**Ei du ei du ei du schöner,
ei du schöner Schnitzelbank!**

Yeah, jetz esch es scho weder sowiit,
d'Fasnacht esch do, jo, das esch öisi Ziiit!
Schnäu esch das Johr vergange
Ond a öisere Chogele bliibe weder verrockti
Gschechte hange....

Zom Bischpöu göhnd öisi Lehrer go proteschiere,
die Sparmassnahme ond weniger Lohn,
das wend die secher ned akzeptiere.

Ou of d'Magie vom Supermond hemmer ned chönne zöue,
wär dä het wöue gseh, het nämlech sis Teleskop
wiit obe müesse go ufstöue.

Aus Diebe scho emmer echli bekannt,
het öper öisi Nati zo de Em us verbannt,
gäge d'Pole hend öisi Giele de better im
Penalty schiesse verlore !!!

Aber wäge dem lönd mer öisi Grende ned lo.hange,
S'Dorffeschts vo Brett nou esch jo no vou im gange.
10'000 Parkplätz müesse do zor Verfügig stoh,
Läck Bobi, do muess jo grad echli öppis goh !!!
Sövu Outo müend a dem historische Aalass chönne parkiere,
man vergleiche, dass send meh,
weder dass de Heitere ame tuet arangiere !!!

Ond jetz no s'bewegenschte Thema vom Johr,
i ha mer fasch d'Zähnd usbesse, esch de Trump,
ond das esch jo so richtig verschesse !!!
Zig mou hani öber dä Clown afo schriibe,
aber täglech wärde die Nachrechte strüber öber die Briide !!
Die aagäblechi Wäutmacht, es esch e truur,
söu g'leitet wärde vo der wahnsennige Wetzfigur...

Dorum tüemer jetz vo dem Thema sofort ablänke,
ond öisi Gedanke gschiter nochli am Bud Spencer schänke.
Oberobe hocket er, tuet Bohne verschlenge
ond lost g'spannt zue, was mer jetz för Gschechtli
öber öisi liebe Brett nouer tüend bringe.

Hät de Frei ufe Freifahrt spekuliert?

Jo dä hät ufe Freifahrt spekuliert!

Am Oktoberfäscht chli schunkle, Bier trinke und Wiisswurscht ässe,
das loht eim de Stress vom Alltag chli vergässe.

Das hät au de Frei Alain dänkt und loht's det loh krache,
bis är sech mues ufe Heiwäg mache.

Vo Zofige uf Brittnau laufe, das liit nümm drinn,
drum hät de Alain es Taxi im Sinn.

Dass das scho voll Lüüt isch und uf Safewil fahre tuet,
isch ihm egal, Hauptsach es Taxi, das chunnt scho guet!

Doch z'Safewil, wo de Alain de no elei i däm Auto isch gsi,
isch's mit sim Optimismus dänn schnäll verbi.

De Schofför wott nämlech z'erscht s'Gält vom Alain gseh,
Und das isches Problem, de chli Frei hät nämlech keis meh...

Do hilft ihm keis bättle, keis schnorre, keis traatsche,
Er mues würtlech uusschiige und vo Safewil uf Brittnau laatsche!!

Tuet dä ned vergäbe warte?

Doch dä tuet vergäbe warte!

D'Ängu vo Brettnou händ e Reis nach Floränz ondernoh,
zo dem Zwäck hett si de Seehouzer Kurt met em Outo of Olte to.

Go abhole chöm är si denn am Bahnhof z'Oute onde,
das händ die Dame de ou ganz lieb vom Kürtu gfonde.

Am Sondig zobe tuet är a Bahnhof nach Oute starte,
doch die Froue händ of sech lo warte.

Nach öpe zwee Stond warte, tuet är Taschte vo sim Telifon dröcke,
do mues är erfahre, die Froue send z'Floränz enere Schöttli-Bar am schlöcke.

Jo Kurt, so Termine settisch haut ufschriebe looh,
de wördisch ned e Tag z'früe am Bahnhof z'Oute stooh.

Het die ned es Bettli gsuecht?

Mou die het es Bettli gsuecht!

Im Juli duet de Sandro ond Tanja s'Jo Wort priise,
ond am Obe ide Fennere zönftig fiire.

De Wegereschreck ond d'Müller Tine dörfe natürlü ned fähle be dem Event,
De Chregu als Tätschmeischer erst rächt i sim Elemänt.

Die zwöi frösch verliebte send am fäschte ond brechte,
so duet me ou s'eint oder andere Bierli vernechte.

Noch de Zwöufne esch Tine de aber of de wegge ond dehee,
es Taxi chauffiert si of e Schürberg hei vor d'Iligangstöör.

Doch vor dere Huustöör stoh, ojemine,
de Huusschlössu im Taxi lolegge ond das esch scho weder wiit im Juhee.

Währenddem gsesch de Schreck of de Fennere emmer no fäschte ond alles gäh,
ond erst gäge Morge Fahrt richtig Schürberg näh.

Im Hondeschöppli gseht är de s'Liecht no brönne,
so wot er dene zwöi Fidoss no es guet Nacht Kössli möge gönne.

Doch de Schreck trefft fasch de Schlag, er het sech ned verluegt,
s'esch nämli Tine wo im Hondechörbli schlofe ond chnorre duet.

Chönnt äch das ned ehres sii?

Mou, das chönnt doch ehres sii!

Z'Brett nou i de Sonne hend die liebe Werts Lüüt
afe vöu Gäscht gwonne.

E grosse Parkplatz, das muess me ne loh,
tüend dene vele Bsuecher zor Verfüegig stoh !!

So chas denn ou passiere,
dass s einte Outo s andere tuet touchiere.

Eines Tages esch es denn sowiit,
tätschts of dem Parkplatz nach langer Ziit.

De Öbutäter, e flotte Gsöu,
mäudet sech be de Sue grad of de Stöu.

Es tüeg ehm leid för dä blai Chare,
wonär us versehe dosse aa heig gfahre !!

Förs Sonne Susi gets do ned vöu z'studiere,
Se tuet eifach dem ehreleche Maa sini Telefonnommere notiere.

Vellech tüeig sech jo plötzlech öpper mäude
ond chonnt verbii, wiiter goht d'Wertin aber de nömme drof ii.

Spöter wo sis denn am Pesche tuet verzöue,
schwengt dä we verrockt met sinere Soppe Chöue.

Susi, das blaue Outo; ond er verzieht e Miine,
cha jo nome öpperem sii, nämlech Diine !!!

Hät die ned es Gnuusch biim Biige?

Doch die hät es Gnuusch bim Biige!

D'Silvia vom Albis cha ned nur Bier uuseloh oder Ilbrächer vertriibe,
drum gits vo ihre au fascht jedes Johr en Schnitzelbank z'schriibe.

Nur i de Chuchi laufts ab und zue nonig so guet,
det verlüürt sie mängisch ihre Heldemuet.

Eso passiert letscht Summer, wo Gäscht Toast Hawaii händ welle ässe
und d'Silvia s'Rezäpt dezue hät vergässe.

Brot, Schinke, Chäs, Ananas es Chriesi ooojeeeee...d'Reihefolg richtig,
wär bi däm Griicht scho wichtig.

Be 5 Zuetate gäbs 120 Variatione zum Kombiniere,
nur fählt de Silvia d'Ziit zum die alli uusprobiere.

Drum lüüet sie churzerhand ihrere Chöchin aa,
und tuet mit de Fabienne das Problem telefonisch duregah.

Silvia, tues nöchtschmol ohni Chriesi probiere,
dänn muesch nur a 24 Kombinatione umestudiere!!

Hett die ned de Chole groue?**Mou die hett de Chole groue!**

Am Oschtersondig ond jetz müend er lose,
do esch i euser Region, nüüt aus toti Hose.
das het sech ou d Sträugass WG dänkt,
ond esch met em Zog richtig Lozärn zue gränkt.
Em Casino tüend de Buechmüler, Hunn ond Förscht chli zocke,
de schpöter tuet si s'Nachtläbe locke.
Party mache ond Bare bsueche esch de gross agseit,
doch jetz hets em Fäbu, Simu, Sändu schwär of d Flente gschneit.
A der Oschtere werd ou z'Lozärn glii gschlosse,
do händs de ganz verdrosse de Wäg retour zom Bahnhof bschlosse
Der letschti Zog esch wäg ond Gäud för s'Taxi hett si groue,
jetz tüends em Hunn sim Brüeder, met em Telifon d'Nacht versoue.
Zmetst i der Nacht darf dä di Jungs z'Lozärn go hole goh,
das chöne mer do Obe jetz ned verstoh.
Jo Jungs so gänder em Hunn de letschti Räscht,
Hauptsach der chömet zor rächte Zyzt es Näscht.

Het dä ned verspötig gha?**Mou dä het verspötig gha!**

Am Dorrfeschtsontig hets z'Mättewil e rechtige Aastorm gäh,
onderanderem hesch ide Rossweid e feini Soppe chönne go näh.
De Garo Marco als Chefkoch wot verwöhne die velle Gäscht,
dezue frösches Brot vom Waber, es get nome s'Bescht.
So duet de am Sonntimorge e Cheschte met Brot vorem Waber stoh,
die Zwe hends eso abgmacht, z'Brett nou chame sech ebe ofenand verloh.
De Garo duet die Fracht verlade,
ond direkt id Rossweid ue fahre.
Doch de Marco chas ned wösse, er cha nüt deför,
s'esch ned guet Wätter hender de Bachstobetöör.
Flueche ond toobe ghörsches us aune Feischter,
verschlofe heter nämli, euse Bäckermeischter.
Z'lang bieret het de Dänu ide Bare ond Beize,
devör de Bachofe z'spot afo iiheize.
wo de das Brot ändli fertig esch met gaare,
merkt er, dass de Garo met de fausche Cheschte esch abfahre.
Jetzt mues de Waber säuber die Bachwaare go bringe,
s'esch e Tag zom vergässe,
sösch hätte die Lüüt nämli s'alte Chöngubrot müesse frässe.

Esch das Filet ned id Hose?**Mou das Filet esch id Hose!**

Es wonderbars Filet im Teig,
leit de Weggereschreck deheim bereit.
Dä Gourmeschmous tuet är jetz bache
om de Tina zom Znacht es Fröideli z'mache.
Bsonders lecker söu das töifgrone Filet den z'letscht sii,
dorom striicht ers ou no zönftig met Eigäub ii.
Ou de Teig het er no schön met de Gable iig'stoche,
spötischtens denn hät ers jo söue merke dä Chnoche !!
Schnäu i Ofe ond das Teili bache,
doch glii drof abe esch es denn am Schreck nömm oms Lache.
Die Folie om das Filtet, mi potztuusig,
foht jetz afo schmörzele ond stenkt ganz grusig !!
Liebe Weggereschreck, probiers doch afe met eifachere Sache,
de Tina chasch secher ou met eme Waudfescht es Fröideli mache...

Sett dä ned chli gnauer lääse?**Doch dä sett chli gnauer lääse!**

De Frei Pöik isch au immer en Gäbige zum überen lache,
settsch halt würtlech emol chli weniger Schiissdräck mache...
Es Auto chaufe, wott er sich das Mol; s'isch kei eifachi Sach,
drumm nimmt är de Roth Steffu mit, dä isch jo vom Fach.
En Hyundaj Pick-Up gäbs mit 100% WIR zum chaufe
und het de Pöik s'Inserat richtig gläse, wär das auä scho guet glaufe.
Eso aber fahre sie zäme uf Bönige im Kanton Bärn,
det stoht de Charre, das glaubt de Steffu ihm gärn.
Doch in Bönige ghörsch die Zwei dänn flueche,
sie finde kei Garage, trotz intensivem sueche.
Dä Steffu luegt sech das Inserat jetz nomol gnauer aa
und gseht, wo de Hooge i däre Sach isch draa.
Die Garage isch ned in Bönige am Brienzersee dehei,
sondern in Bösinge, Kanton Fribourg... eiei...
Also wiiter uf Bösinge, jetzt chunnts au nümme druf aa,
sie händ eh scho de halb Tag verlööled gha.
In Bösinge äntlech aacho, isch als Tüpfli ufem l
de Garagischt, so schpoot, scho im Fiirrobe gsi...
Ok, das Auto isch jetzt äntlech gfunde, kauft und dehei, doch es
Happy-End isch no lang ned in Sicht,
es stoht jetzt nämlech i de Auto-Klinik und de Pöik wartet ufe Reparatur-Briicht.
De Aalasser, d'Heizig, fascht nüt funktioniert be däm Chaare,
die Tour de Suisse hetsch der chönne spaare
wärsch auä besser und vorallem schnäller gfahre!!

Händ die ned de Grössewahn?**Mou die händ de Grössewahn!**

S'OK vom Dorffescht 2016 das esch Gschecht,
doch jetzt loset, do chonnt euse Brecht.
Plakat, Flyer ond e Broschüre wärde do bschtöut,
Doch eine vo dene Geuggle hett do ned rächt zöut.
Guet 5000 Stöck send am Ändi vörig, das get roti Grende,
jo Hergottsdonnerwätter die chasch jetzt aui e der Papiersammlig fende.
Ou öppe 10000 Parkplätz send in planig,
me frogt sech was meinsch Du oder Du, jo i ha ou kei Ahnig.
So veu Lüüt of einisch, das hätt Brettnou no gar nie gseeh,
Tuet das dem OK ächt ned e chli weeh.
Eis liebi Organisatore, das muess me euch looh,
der wärded aus türschts OK e d Gschecht igooh.

Het die ned chli Müeh met fahre?**Mou die het chli Müeh met fahre!**

Im Frühlig gsesch eini ganz fescht strahle,
s'Lienhard Yoli cha ändlech meteme neue Outo ome fahre.
Vor de Stierli Garage stoht die Perle parat,
e Nissan met allem drom ond dra, ond erscht no e Outomat.
So wird de dä neu Liebling ou grad bruucht, me get Gas,
schliesslech macht eso ou de Wäg för of d'Arbet richtig Spass.
Doch noch paar Minute ond Meter, es esch en Gruus,
chonnt das Yoli be dem Outo gar nömm druus.
Fahre ond motore das got, das esch guet,
aber zwänzg Stondekilometer esch s'Maximum was die
Japaner Schiisi loufe duet.
So duet si de Frönd, de Thömu kontaktiere, es esch vereckt,
ond dä het de Fähler de gli entdeckt.
Jo Yoli, Outofahre esch haut scho e Konscht,
vorallem wenn nor de erscht Gang bem Schauthebu ine bechonsch

Söt me do ned besser luege?

Mou do söt me besser luege!

Chörzlech send zwe vo Spanie hei g'fahre,
ond hend no müesse go tanke ehre Chare.
Be de nöchschte Raschtstätte möche de Kuenz Fipu
Ond de Schänk Heinz denn e Stop,
Heinzel, dä goht go bisle, Fipu tanket ond zahlt denn
dä Moscht i dem Shop.
Im Wäusche send die Süüle haut chli anderscht aagschrebe,
aber dass me das de gliich no tuet verwächsle,
fendi de doch echli öbertrebe !!!
Of de Wiiterfahrt merkt de Fipu de gschockt,
dass das Outo emmer eso kommissch stockt.
Schnäu esch ehm de ou i Senn cho,
dass är statt Diesu, Bänzin het i dä Tank ie to.
Met ere riise Portion Glöck,
esch das Outo nochli g'fahre, das guete Stöck !
Grad bes zo de nöchschte Uusfahrt send die zwe no cho,
gottesidank das dört grad no e Landi tuet stoh !
Zom de Tank uuspompe goht de Fipu jetz gone Schluuch choufe,
aber das het de grad gar ned klappet, es esch zom devo loufe !!
Jetzt get ou de Fipu chli bii ond gsehts ii,
dass ehri Rettig nome no de TCS cha sii.
Zom Schloss säge mer jetz öich no öppis gärn,
wär richtig cha tanke, stoht scho no ontereme guete Stärn.
Au Johr hemmer nämlech dere tanki Gschechte,
wo mer emmer weder vöu chönnte dröber brechte !!!
Ou de Lanz Thömu muess de Chamme gar ned eso stöue,
sösch fömmer nämlech öber sini Story ou no grad afo verzöue !!!

Het dä ned e töife Schlof?

Mou dä het e töife Schlof!

För e Hotschebau duet me vor de Fasnacht zäme hocke,
Zimmerli Resu, Kunz Resu, Geret Fredu ond Konsorte.
Be chli frässe ond es paarne Bierli im Grend,
chonnt eim so mäenge Seich i Senn.
So düend die Schlockspächte a dem Geuggle omestodiere,
ond erst am nöchste Morge, Mittag hei zue spaziere.
Jetzt is Näscht go lege, de jong Setzlig esch zom beduure,
duet doch de Sommer Willu a de Huustöör öppis ome schruube.
Bes de die Schliesstechnik iiwandfrei weder duet fonktioniere,
chönnt me sech jo afängs of de Polstergroppe bequem plaziere.
Wo de Willu de fertig esch met de Buez, es chlises Malör,
esch si doch bschlosse die verfluechti Töör.
De Resu am penne, de Sommer stoht ide Wohnig met sim Pack,
ond de einzig Schlössu esch bem Setzlig im Hosesack.
Jo Resu, los doch lo si, wenn's nömm magsch verliide das doremache,
de mues de Willu ou ned Öberstonde schriibe,
bes du usem Koma duesch verwache.

Tüend die ned e Omwäg mache?

Mou die tüend e Omwäg mache!

Of Lozärn ie es Rammstein Konzärt go lose ond e chli fiire,
e betz Aukohou gniesse ond e chli Liire.

Eusi Kunz Petra ond ere Maa löhnd sech das ned lo näh,
dass das öppe schwäri Grende get, chas öppe gäh.

S'Konzärt esch verbii, ond nor schnäu met em Zog weder hei,
Das esch ned ganz eifach met emene storme Stei.

E betz schlofe em Zog richtig Zofige zue, das muess jetzt sii,
wos verwache send si scho z'Zofige gsii.

Jetzt aber use ond sofort Hei zue,
jo chasch danke die Töre loht sech oms verrecke mömm uf tue.

Of Bärn ue gohts jetzt of direktem Wäg spoht i der Nacht,
läck händ die e langi Zogfahrt gmacht.

Jo Petra, liebe Fippu, dänket dra, wär em Zog enn schloft,
wird meischtens met eme grosse Omwäg gstroft.